

Señor Victor Lopez: Cabesante di Mon Plaisir Mavo

"NOS POR CONSTATA UN TENDENCIA CU DI UN FORMA OF OTRO, NOS HOBENNAN TA NA PELIGRO!"



ORANJESTAD (AAN) — E hecho cu den menos cu dos luna cinco hoben a perde nan bida tragicamente, tin mayoria di hende den nos comunidad hopi preocupa, y un di e personanan cu kier a expresa e sentimento comun aki, ta señor Victor Lopez, cabesante di Colegio Mon Plaisir MAVO.

Como ciudadano, como tata, y tambe como docente cu tin un trayectoria largo guiando hobennan adolescente, señor Lopez a analiza cierto circunstancianan cu ta forma parti di e totalidad di factornan cu ta afectando, di un of otro forma, nos hubentud. Den dos articulo, DIARIO ta trece den luz publico, e comentario amplio y interesante cu señor Lopez a duna nos redaccion.

KICO TA PASANDO NA ARUBA?

Esaki ta un pregunta cu por tende hopi e dianan aki bao nos comunidad. Señor Lopez tambe ta haci su mes e mesun pregunta.

"Den e periodo cu nos ta pasando aworaki, nos tur por mira cu den menos cu dos luna, como siete hoben a fayece tragicamente, sin conta e cantidad di hobennan cu tabata involvi den un of otro accidente, manera e tres muchanan riba lama cu Dios gracia, a worde rescata.

Pero nos por constata un tendencia cu nos hobennan ta, na un forma of otro, na peligro. Bo ta puntra bo mes ta di unda e peligro ey ta bin y con por ta cu tanto hoben ta involvi den situacionnan asina. Mi no ta kere cu nos por yega culpa mayor, gobierno of maestronan, pasobra ta algo cu ta den nos comunidad, y en general nos como comunidad na e momentonan aki no tin suficiente atencion pa nos hobennan, y esey ta conta pa nos tur cu ta biba na Aruba", señor Lopez a expresa.

KICO NOS TA HACIENDO FOUT COMO MAYOR?

Señor Lopez a acentua cu envez di punta dede riba sea mayornan, polis, of docentenan of gobiernu, cada ken mester analiza su mes.

"Cada un di nos como mayor, mester para keto un rato y analiza kico cada un ta haciendo fout, sea como mayor, como educador, como politico, como empleado di husticia, y como ciudadano responsable pa educacion di nos hobennan.

Esaki ta unico manera cu nos tur hunto por wak kico nos por haci pa evita cu situacion aki sigui ripiti", señor Lopez a acentua.

POCO ACTIVIDAD TIN PA HOBEN:

Papiando riba factornan general cu por beneficia of afecta nos hubentud, señor Victor Lopez a cuminza pa analiza e aspecto di recreacion sano pa nos hobennan.

"Si nos wak rond na Aruba: ¿cuanto actividad sano enberdad nos tin pa nos hobennan despues di school?—

Pa loke ta trata muchanan cu ta bay school basico Traimerdia ta haciendo un trabao tremendo den e sentido di actividadnan, y nos ta wak cu e grupo ey no tin mucho dolor di cabes pa despues di school. Pero e problema ta cuminza na muchanan di school avanza, EPB, MAVO y Colegio.

Pa nan enberdad no tin mucho actividad sano. Deporte ta problema so tin manera nos sa, baseball ta para mi'n sa pa cuanto aña, awor ta futbol tin problema, y asina nos por sigui. E estado di e canchonan di deporte ta terrible, pues deporte no tin e empuhe cu mester tin pa kita nos hobennan for di caya.

Actividadnan social manera scouting, arte: musica, teatro, pintura, etc., tampoco ta hay-

ando suficiente sosten pa desaroja un ambiente caminda hobennan tambe ta bay pasa nan tempo liber.

Aworaki ta e temporada cu tin hopi actividad anochi, y nos ta wak cu anochi constantemente nos hobennan ta riba caya pa participa den un actividad di carnaval. Pero despues di carnaval no tin mucho cos tampoco pa nan", señor Lopez a comenta.

FALTA DI BALANSA DEN EDUCACION DI CAS:

Encuanto educacion di cas señor Lopez ta ripara cu bao cierto grupo di nos comunidad (sin generaliza) tin mayornan cu ta laga hopi di desea pa loke ta trata atencion riba yiu.

"Tin mayornan ta laga nan muchanan for di hoben caba, keda anochi laat riba caya, y hopi biaha nan no sa mes unda nan yiunan ta, envez di tin control riba nan.

Bo ta wak muchanan di 12 pa 13 aña cu pa 3'or di madrugada ta ainda riba caya.

Den educacion nos falta na Aruba un balansa caminda, parcialmente, nos ta duna nos yiunan e libertad cu nan merece y cu nan por maneha, unda di otro banda tin limitacionnan cu como mayor responsable bo mester pone pa nan.

Logicamente sin generaliza, loke nos ta wak aworaki ta un grupo grandi di mayor cu no tin gara riba nan yiunan cu ta nan ta dicidi kico nan ta haci, y mayor tin nada di bisa.

Di otro banda tin mayornan cu ta dunando nan yiunan stress door di exigencianan cu, como ser humano, nan no por cumpli cune".

Un ehemplo cu señor Lopez a menciona ta ora un mucha ta haci su maximo esfuerzo cu un materia pero e no por logra mas ariba cu un seis. E mayornan ta exige 8 y no ta tene cuenta cu otro cifranan riba mesun rapor cu ta 7 y 8. Pa esaki e mucha no ta haya ni sikiera un recompensa di palabra.

Esaki ta un tipo di situacion cu ta frustra e hoben, ken hopi biaha ta busca un manera menos positivo pa huy for di e problema.

"Asina tin mas ehemplo unda cu nos tur conhuntamente ta fayando door di no crea situacionnan positivo y sano caminda cu nos muchanan por tuma parti di dje" e cabesante a señala.

Den otro articulo DIARIO lo sigui elabora riba e manera profundo con señor Victor Lopez a analiza e factornan di riesgo, cu di forma directo of indirecto, awendia ta afectando nos hubentud.